

Lima penerima tajaan biasiswa tamat pengajian

BINTULU: Seramai lima penerima tajaan biasiswa dari alumni Universiti Putra Malaysia (UPM) berjaya menamatkan pengajian masing-masing pada Majlis Konvokesyen UPM ke-47, Sidang 1, di UPM Kampus Bintulu (UPMKB) di sini, baru-baru ini.

Menurut kenyataan UPMKB, mereka adalah Nurul A'fifah Nabila Ahmad (Diploma Pengurusan Perladangan Makanan) di bawah tajaan Biasiswa Soh Kim Mee, Muhammad Khairin Danish Mohd Khairani (Diploma Pengurusan Perladangan Makanan) di bawah tajaan Biasiswa TMJ serta Mirna Makiri (Diploma Pertanian), Nurul Sajeedah Abd Rahman

(Diploma Pertanian) dan Muhammad Mu'izuddin Sakka (Diploma Pertanian) di bawah tajaan Biasiswa Chapter Cyperus 92' (2.0).

"Kesemua pelajar ini antara 484 graduan yang berjaya menerima Ijazah Doktor Falsafah (Ph.D), Sarjana (Master), Bachelor dan Diploma yang telah disampaikan oleh Tuanku Canselor UPM, Sultan Sharafuddin Idris Shah, di Dewan Sri Kenyalang pada 4 November lalu.

"Selama tiga tahun pengajian ke semua pelajar ini, setiap kos berkaitan pengajian telah dibiayai sepenuhnya daripada pihak penaja yang merupakan alumni UPM sama ada yang sedang berkhidmat di

UPM dan juga yang berjaya dalam industri masing-masing di luar UPM," katanya.

Ujar kenyataan itu, mereka menikmati keistimewaan tersebut sejak tahun satu pengajian yang mana mereka dipilih dengan kriteria tertentu.

"Syarat utama adalah mereka perlu cemerlang dalam akademik, aktif dalam kokurikulum dan diberikan keutamaan kepada para pelajar yang memerlukan bantuan kewangan seperti daripada golongan keluarga B40, asnaf dan juga pelajar Orang Kelainan Upaya (OKU)," katanya.

Menurut Pendaftar UPM yang juga Penaja Biasiswa Alumni QKB MPP 04

Muhazam Mansor dalam kenyataan itu, pihaknya bangga melihat pelajar yang ditaja itu berjaya menerima skrol masing-masing.

"Kami mengharapkan pelajar semua memanfaatkan ilmu dengan sebaiknya untuk diri sendiri, keluarga, bangsa, agama dan juga alma mater tercinta.

"Pelajar semua sudah bergelar alumni UPM maka jadilah alumni yang memainkan peranan yang terbaik untuk kita bersama-sama mengharumkan nama UPM dan bersama-sama dengan universiti untuk menggalas amanah dan tanggungjawab demi memartabatkan institusi pendidikan negara," ujar beliau.